

TUTÚ DÍHNA NUU NĪ CADÚHA TÉ PĀBLÚ QUÍHĪⁿ NDAHA TÉ TIMÙTEÚ

Té Pāblú cādūha-dé tutú quíhĪⁿ ndaha té Timùteú

1 ¹Yúhú té Pāblú ní tendaha ñàha Yá Ndiöxí càháⁿ-í tnúhu Xítohó Jesucristú núú ñāyiu chi ducaⁿ ñĭ cachí Yă Ndiöxí cunduu, te diu-gá cúú-gă Yaá ní dácăcu nihnu ñaha xii-o núú ùhú núú ndàhú. Te tnàhá Xítohó Jesucristú ducaⁿ ñĭ cachí-gá sá càháⁿ-í tnúhu-gá, te diu-gá ní taxi-gá tnúhu ndee ìní xii-o să cùndècu-o ndihĭ-gá ni caa ni quíhĪⁿ. ²Te yòhó té Timùteú cúú-n ìĭⁿ tée ní sanu ichi ndisa-í ichi Xítohó Jesucristú chi ío váha ní sándáá iní-n-gă. Te càdúha-í ìĭⁿ tutú daquixi-í ndaha-n. Te xicáⁿ táhù-í núú Tătá-ó Dütú Ndiöxí ndihĭ núú Xítohó Jesucristú sá ĩo na chindee chitúu ñaha-gă xii-n, te ducaⁿ ndĭ nduú-gá ná cádá te ío váha cuu iní-n cùndecu-n.

Cuèndá nchaa ñāyiu dāndahú tnàha ñāyiu-xi

³Te nàha-n nacuáa ní cáháⁿ-í cútnàhá ní quee-í ñúú Éfesú véxi-í distritú Macèdoniá, chi ní cachí-í sá quéndöo-n ñùú-áⁿ cǎháⁿ-n dōho nchaa ñāyiu dāndahú ñáhá cǎchí sá càháⁿ tnúhu Yá Ndiöxí te ñá ndàá sá càháⁿ-yu tnúhu-gá, te diu-ni ducaⁿ càháⁿ-í vitna cada-n cùndecu-n. ⁴Te cúñaha-n xĭi-yu sá vǎ cádá cuèndá-yu nchaa cuèndú ñihĭ-yu nācuáa ní xóo cada ñāyiu ní xindecu ndéé sanaha, te nchaa cuèndú-áⁿ dĭcó chinàá ñáhá-xí chi ñá túú vĕdana nāndĭhi-xi, te ni ñà túú chindee ñaha-xi cada-o nacuáa cuìní Yă Ndiöxí, chi mee-ni să quìndáá iní-ó-gă quídé-xí quĭde-o nchaa nacuáa cuìní-gá.

⁵Te duha càháⁿ-í cúñaha-n xĭi-yu cuèndá sá ná cùu iní-yu tnàha ñāyĭú-yu, te xĭni ñuhu-xi nduu ndoo nduu nine iní-yu, te cunduu váha iní-yu, te quìndáá iní-yu Yá Ndiöxí, te vá cánĭ ìĭⁿ canĭ úú iní-yu, te núu ducaⁿ na càdá-yu te cuu iní ndisá-yu nchaa tnàha ñāyĭú-yu. ⁶Chi dava ñāyiu ñá túú-gă quídĕ-yu nchaa nācuáa càháⁿ-í-a, chi mee-ñă nchaa cuèndá sá ñă túú vĕdana nāndĭhi xĭcáháⁿ-yu. ⁷Te cuìní-yu cáháⁿ-yu nchaa tnúhu ní cáháⁿ ndĭi Moisés dico ñá ndácŭ-yu, chi cuĕi ni yùhu ni iní-yu

1 TIMOTEO 1

càháⁿ-yu dico ñá tècú tnùní-yu nàcuáa ní cáháⁿ ndíi, te ni tnũhu càháⁿ mée-yu ñá cútnùní iní-yu nàcuáa ndùu-xi.

⁸Te sa nàha-o sá ncháá tnũhu ní cáháⁿ ndíi Moisés váha, te núu na tècú tnùní-ó nã cuendá ducaⁿ ñí ngúndecu nchaa tnúhu-áⁿ. ⁹Te cùtnuní iní-ó sã ñà díú sã cúú-xí nchàa ñáyiu quide váha ndècu ñuyíú-a ni ngúndecu nchaa tnúhu-áⁿ, chi ní ngúndecu-xi sá cúú-xí nchàa ñáyiu ñá túú quide váha, ndíhi cuendá nchaa ñáyiu ío sàá iní-xi, ndíhi cuendá nchaa ñáyiu quide cuehé quidé dùha, ndíhi cuendá nchaa ñáyiu ío ndècu cuéchi-xi, ndíhi cuendá nchaa ñáyiu ñá túú nèhe védana sá yíñùhu núú Yã Ndiöxí, ndíhi cuendá nchaa ñáyiu ñá túú càháⁿ váha cuendá ichi Yá Ndiöxí, ndíhi cuendá nchaa ñáyiu sàhni tátá-xi ndíhi nãná-xi, ndíhi cuendá nchaa dava-gá ñáyiu sàhni tnaha, ¹⁰ndíhi cuendá nchaa cue téè càháⁿ ndíhi ñáyiu ñíhí te ñá díú ñàdihí-güedé cúú-yu, ndíhi cuendá tucu nchaa ñáyiu ñíhí càháⁿ ndíhi cue téè te ñá díú yí-yu cùu-güedé, ndíhi cuendá nchaa cue téè càháⁿ ndíhi tnàha ndi mee téè-xi, ndíhi cuendá nchaa ñáyiu chiváha tnàha ñáyiu-xi cuendá sá cuiní-yu níhí-yu díhúⁿ, ndíhi cuendá nchaa ñáyiu ndehnde, ndíhi cuendá nchaa ñáyiu càcunehe ndéé Yã Ndiöxí cuendá cuiní-yu cutnùní iní tnàha ñáyíú-yu sá càháⁿ ndáá-yu, te ñá ndáá sá càháⁿ ndáá-yu, ndíhi cuendá nchaa ñáyiu quide nchaa dava-gá sá ñà túú tàuchiuⁿ Yá Ndiöxí cadá-yu. Cuendá nchaa ñáyiu ducaⁿ xiquide ní ngúndecu nchaa tnúhu-áⁿ. ¹¹Te nchaa tnúhu-áⁿ ñíⁿ-ni cùu-xi ndíhi nchaa tnúhu sá ñí cachí Yã Ndiöxí cáháⁿ-í, te tnúhu-áⁿ cúú-xí tnũhu váha vìhi, chi mee-gã ío váha iní-gá.

Té Pãblú ndàcáⁿ táhú-dě núú Yã Ndiöxí sá ñí cundàhú iní ñáhá-gã xii-dé

¹²Te Xítohó Jesucrìstú ní cutnùní iní-gá sá cadá ndáá-í cada-í nchaa chiuⁿ tahu-gá. Te ndàcáⁿ táhú-í núú-gã sá ñí taxi-gá chiuⁿ-gá quidè-í, te ío chindee ñaha-gá xii-í. ¹³Te ní taxi-gá chiuⁿ-gá quidè-í cuèi ní xóo cáháⁿ cuèhé-í cuendá-gá, te cuèi ní xóo cúú cuèhé cúú duha-í nchaa ñáyiu ndècu ichi-gá, te cuèi nándi-gá sá ñí xóo cada-í-yu dico ní cundàhú iní ñáhá Yã Ndiöxí xii-í, chi vátá quindáá-gá iní-í Xítohó Jesucrìstú cútnàhá ducaⁿ ñí xóo cada-í, te ni ñã cútnùní iní-í nchaa sá quidè-í ní cùu, te cuèi ducaⁿ ñí xóo cada-í, ¹⁴dico Yá Ndiöxí ío ní cundàhú iní ñáhá-gã xii-í te chindee ñaha-gá. Te mee Xítohó Jesucrìstú chindèe ñaha-gá xii-í sàndáá iní-í-gá, te cùu iní-í nchaa tnàha ñáyiu-í.

¹⁵Te ñíhí-ó tnũhu sá Xítohó Jesucrìstú ní quixi-gá ñuyíú-a cuendá sá dácãcu nihnu-gá nchaa ñáyiu ndècu ichi cuehé ichi duha. Te tnúhu-áⁿ cúú-xí ñíⁿ tnúhu ndáá, te xini ñuhu-xi quindáá iní nchaa nchoo ñáyiu ndècu ñuyíú-a. Te yúhú cùu-í téè ío-gá ndécú cuéchi-xi núú Yã Ndiöxí ní cùu.

¹⁶Te Yá Ndiöxí ní cundàhú iní ñáhá-gã ní dácãcu nihnu ñaha-gã xii yúhú

tée xidó ndécú cuěchi-xi ni cùu, cuendá cutnùní iní nchaa ñáyiú sá Xítohó Jesucrístú ío càhnu iní-gá. Te sá dúcáⁿ ñí quide ñaha-gă xii-í, te xíăⁿ cutnùní iní-yu sá nũu na quindáá iní ñáhă-yu xii-gá te cundecú-yu ndihi-gá ñí caa ñí quíhíⁿ. ¹⁷Te nchaa-o chĩ ná cächí-ó sã ïo càhnu cuu Yá Ndiöxí, te canehe-o sã yĩñuhu núú-gă ñí caa ñí quíhíⁿ, chi mee-gă cúú-gă Yaá táxí tnùní nchaa nduu nchaa quíú. Te cùu-gá ïíⁿ Yaá ñá túú xìní núú-ó, te ïíⁿ dđi dđi-ni-gă ío ndècu ndihi-gá nchaa sá xìní tnùní-gá.

¹⁸Te yòhó té Timùteú tée cùu datná ïíⁿ déhe mee-ĩ sa nàha-n nacuáa ní cáháⁿ dava-gá cue tée cáháⁿ tnúhu Yá Ndiöxí cuendá-n, te diu-ni ducaⁿ cáháⁿ-ú tucu, te cada-n nchàa nacuáa cáháⁿ tnúhu-áⁿ chi diu nchaa tnúhu-áⁿ canu ichi ñaha-xi xii-n cada-n nchaa nacuáa cuiní Yă Ndiöxí. ¹⁹Te ío quindáá iní-n Xítohó Jesucrístú, te cada váha-n cundecu-n nacuáa cundecu váha iní-n, chi dava ñáyiú ñá túú-gă ducaⁿ quidé-yu núu xíăⁿ ñá túú-gă sàndáá iní-yu nàcuáa cáháⁿ tnúhu-gá. ²⁰Te diu-ni ducaⁿ ñí quide té Himèneú ndihi té Lijandrú ní dáñá ndèé-güedé ñá túú-gă sàndáá iní-güedé nàcuáa cáháⁿ tnúhu Xítohó Jesucrístú, te ní xáhaⁿ-ĩ xii-güedé sá ná cùndoho-ná-güedé nũu nása cada ñaha sàcuíhná xii-güedé, te ducaⁿ ñí xáhaⁿ-ĩ cuendá sá vă cáháⁿ cuèhé-gá-güedé cuendá Yă Ndiöxí.

Nàcuáa cáháⁿ ndihi-o Yă Ndiöxí

2 ¹Te na cächí tnúhu-í xii-n nchàa nacuáa cada-n. Te díhna-gá cächí tnúhu-í sá cáháⁿ ndihi-n Yă Ndiöxí cuendá nchaa ñáyiú te núu nása cùu xíndecú-yu, te cácaⁿ táhú-n nũú-gă cuendá-yu, te ducaⁿ ïo ndacaⁿ táhú-n nũú-gă cuendá nchaa sá văha quide ñaha-gá xii-yu. ²Te ducaⁿ cáháⁿ ndihi-n Yă Ndiöxí cuendá nchaa cue tée cùnuu ndihi cuendá nchaa dava-gá cue tée cùchiuⁿ cuendá cada váha-güedé, te ducaⁿ nchò ñá túú ñă cuu cundecu-o, te ñá túú tnàhí ná caní iní-ó cundecu-o, te ío cundecu yĩñuhu-o núú Yă Ndiöxí, te cada-o nchàa nacuáa tàú-xi cunduu. ³Te núu ducaⁿ na càda-o cáháⁿ ndihi-o Yă Ndiöxí cuendá nchaa ñáyiú te quide váha-o, te ndùu vétú iní Yă Ndiöxí Yaá ní dácăcu nihnu ñaha xii-o núú ùhú núú ndàhú. ⁴Te mee-gă cuiní-gá sá ncháá ñăyiú tecú tnùní-yu nchaa tnúhu cáháⁿ-gá, chi cuiní-gá sá nánihí tàhú-yu. ⁵Te ïíⁿ-ni Dútú Ndiöxí ndécú, te ïíⁿ-ni Xítohó Jesucrístú, te medì-ni Xítohó Jesucrístú quidé-gă tnàhá tnúhu-o ndihi Yá Ndiöxí. ⁶Te Xítohó Jesucrístú ní dáñá-gă méé-gă ní sahní ñaha-güedé xii-gá cuendá sá cuiní-gá sá căcu nihnu nchaa ñáyiú ndècu ñuyú núú ùhú núú ndàhú. Te Yá Ndiöxí cuiní-gá sá ncháá ñăyiú ñuyú ndécú vitna níhí-yu tnúhu nàcuáa ní cuu ní xíhí Xítohó Jesucrístú. ⁷Te Yá Ndiöxí ní cachí-gá sá cáháⁿ-í tnúhu-áⁿ ndèni ní cuu núú xíndecú ñáyiú ñá túú cùu ñáyiú isràél, te mee-ni tnúhu ndáá dánèhé-í-yu nàcuáa quindáá iní ñáhă-yu xii-gá, te yúhú cáháⁿ ndáá-í sá Yă Ndiöxí ní cachí-gá sá cáháⁿ-í

tnúhu-gá chi ndècu ndihí-í Xítohó Jesucrístú, te ñá túú dándahú ñáhà-í xii-n.

⁸Te yúhú cuíní-í sá ncháá xìchi cáháⁿ ndihí cue téé Yá Ndiöxí, te na cùnduu ndoo cunduu nine iní-güedé òré ndonehe-güedé ndaha-güedé cáháⁿ ndihí ñaha-güedě xii-gá, chi vá cúú cùdééⁿ-güedě cuendá nchaa sá quidé ñàha ñáyiú xii-güedé, te ni vǎ cání ìní-güedé cúcuèhé tnáhá-güedě ndihí-yu. ⁹Te càchí tnúhu-í xii-n sǎ ncháá ñáyiú òhí ná cùnduu dío-yu nàcuáa tàú-xi cunduu, te vá cùnduu cuehé cunduu duha dàtná cáá ò nchaa ñáyiú ndècu ichi cuehé ichi duha, te na ndàdá-yu díquǐ-yu nàcuáa tàú-xi cunduu, te vá ndàdá cuèhé ndada duhá-yu, te vá cání ìní-yu cunduu vií-yu ndihí sá ò ndèyáhu, te ni vǎ cání ìní-yu cuihnú-yu dóó sǎ ò ndèyáhu. ¹⁰Te mee-ni sǎ vǎha cadá-yu, chi ducaⁿ tàú-xi cada nchaa ñáyiú òhí ndécú ichi Yá Ndiöxí. ¹¹Te òré tàcá-yu núú dácuahá-yu tnúhu Yá Ndiöxí, te cue ñáyiú òhí-áⁿ na nàhi dacuahá-yu tnúhu-gá, te cadá-yu nchaa nàcuáa càháⁿ cue téé dàcuaha ñaha xií-yu tnúhu-gá. ¹²Te yúhú càchí-í sá vǎ cúú dàcuaha ñáyiú òhí cue téé, te ni vǎ cúú tàxi tnuní ñáhǎ-yu xii-güedé chi cunduu tnàví-ni yuhú-yu cundedóho-yu. ¹³Te ducaⁿ xini ñuhu-xi cadá-yu, chi Yá Ndiöxí ní cadúha-gá díhna-gá té Àdán te dàtnùní ní cadúha-gá tá Èvá. ¹⁴Te ñá díú mèe té Àdán ní dándahú-xi, te ñá túú ní quide váha-xi núú Yá Ndiöxí sá dúcáⁿ ñí sándáá iní-xi tnúhu ní cáháⁿ sácuihná-ǎⁿ. ¹⁵Dico ñáyiú òhí ní nduu táhǔ-yu sá cóó òhe-yu, te naníhí tàhú-yu te núú vá dáñá ndèe-yu canchicúⁿ nihnú-yu ichi Yá Ndiöxí, te cundecu yíñùhú-yu núú-gǎ, te cuu iní-yu nchaa tnàha ñáyiú-yu, te cadá-yu nchaa nàcuáa tàú-xi cunduu cundecú-yu.

**Nàcuáa tàú cue téé yìndaha ñaha xii ñáyiú ndècu ichi Yá Ndiöxí
cada-güedé**

3 ¹Te òó ìíⁿ tnúhu càháⁿ ñáyiú sá ñuu ìíⁿ téé cuíní quindaha ñàha xii ñáyiú ndècu ichi Yá Ndiöxí, te ìíⁿ sá vǎha cuíní-dé cada-dé càchí-yu, te ndáá quée-xí tñuhu càháⁿ-yu. ²Te yúhú càchí-í sá cuè téé ducaⁿ na quindaha ñaha xii ñáyiú te xini ñuhu-xi cuu-güedé cue téé quide ndáá cuendá sá vǎ càháⁿ ñáyiú cuendá-güedé sá ñà túú quide ndáá-güedé. Te na cùu-güedé cue téé ndèca ìíⁿ caa-ni ñadihí, te na cùu-güedé cue téé ñá túú quide cutexínu ndècu, te na cùu-güedé cue téé quide nchaa nàcuáa tàú-xi cunduu, te na cùu-güedé cue téé sǎñaha nùu vehe ndetatú nchaa ñáyiú ñùhu ichi, te na cùu-güedé cue téé dànehé ñáhá vǎha xii ñáyiú tnúhu Yá Ndiöxí. ³Te vá cúú-güedě cue téé quihu, te ni vǎ cúú-güedě cue téé ndùcu pletú, te ni vǎ cúú-güedě cue téé òcò-ni ducaⁿ òhí díhúⁿ, te ni vǎ cúú-güedě cue téé sàni iní nàá, te ni vǎ cúú-güedě cue téé ñùhu iní mee-ni

dǐhúⁿ. Chi na cùu-güedé cue téé váha iní-xi te cunduu càhnu iní-güedé. ⁴Te na cùu-güedé cue téé ío váha sànu ichi ñadihí-xi ndihi landú-xi, te na cùu-güedé cue téé quide nacuáa sàndáá iní ñáhá làndú-xi cuendá canehe-güexi sá yíñùhu núú-güedě. ⁵Chi núu cùu-güedé cue téé ñá ndácú cànuichi ñadihí-xi ndihi landú-xi, te vá ndácú-güedě quindaha-güedě cue ñáyiu ndècu ichi Yá Ndiöxí. ⁶Te vá cúú-güedě cue téé íchí ni sàndáá iní-xi tnúhu Yá Ndiöxí, chi na cuáháⁿ te cada nínu-güedé méé-güedě te cuíta nihnu-güedé dàtná ní xíta nihnu sácúíhná. ⁷Te xìni ñuhu-xi cuu-güedé cue téé càháⁿ váha ñáyiu cuendá-xi, cuéi ñá díú ñáyiu ndècu ichi Yá Ndiöxí cuendá sá vǎ cuátnùhu ñaha ñáyiu xii-güedé, chi núu ñáhá te cudana te sácúíhná quesaha-xi tàxi tnuní ñáhá-xí xii-güedé.

Cue téé chindee ñaha xii cue téé yìndaha ñaha xii ñáyiu ndècu ichi Yá Ndiöxí

⁸Te tnàhá cue téé chindee ñaha xii cue téé yìndaha ñaha xii ñáyiu ndècu ichi Yá Ndiöxí xíní ñùhu-xi cuu-güedé cue téé quide nchaa nacuáa tàú-xi cunduu, te vá cúú-güedě cue téé càchí sá càháⁿ ndáá te ñá ndáá, te ni vǎ cúú-güedě cue téé quihu, te ni vǎ cúú-güedě cue téé sàni iní-xi dícó-ni ducaⁿ ñíhí dǐhúⁿ. ⁹Te xìni ñuhu-xi cuu-güedé cue téé ñá túú dàña ndeé sàndáá iní tnúhu Yá Ndiöxí, te na cùu-güedé cue téé ío váha cùu iní-xi cuendá nchaa sá vǎha quide-güedé. ¹⁰Te xìni ñuhu-xi coto ndeé ñáhá xii-güedé te núu cùu-güedé cue téé quide váha, te núu cùu-güedé cue téé quide váha ña te cuu chindee-güedě cue téé yìndaha ñaha xii ñáyiu ndècu ichi Yá Ndiöxí. ¹¹Te tnàhá tucu nchaa ñáyiu dǐhí ná càdá-yu nchaa nàcuáa tàú-xi cunduu, te vá cúndùu yiti yuhú-yu, te ni vǎ cúú-yu ñáyiu quide cutexínu ndècu, te na cúú-yu ñáyiu ío váha quide ndáá. ¹²Te nchaa cue téé chindee ñaha xii cue téé yìndaha ñaha xii ñáyiu ndècu ichi Yá Ndiöxí, xìni ñuhu-xi cuu-güedé cue téé ndècu ìiⁿ caa-ni ñadihí-xi, te na cùu-güedé cue téé sànu ichi váha ñadihí-xi ndihi landú-xi. ¹³Te núu na càda ndáá-güedé chindee-güedě cue téé yìndaha ñaha xii ñáyiu ndècu ichi Yá Ndiöxí, te canehé-yu sá yíñùhu núú-güedě, te ducaⁿ te vá cúú càháⁿ núú-güedě càháⁿ-güedé núu ñáyiu tnúhu Xítóhó Jesucristú sá sàndáá iní-güedé.

Ío càhnu cuu tnúhu càháⁿ Yǎ Ndiöxí

¹⁴Te cuíní-í ndǐhi-ni quixi coto ñaha-í xii-n dico díhna-gá cádúha-í tutú-a daquixi-í ndaha-n ¹⁵chi na cuáháⁿ cuyaa-í. Te xíaⁿ nùu càdúha-í tutú-a daquixi-í ndaha-n cuendá cutnùní iní-n ñasa cada-n cùndecu-n ndihi nchaa ñáyiu ndècu ichi Yá Ndiöxí. Te ñáyiu-áⁿ cúú-yu dàtná ìiⁿ vehe cùu cuendá Yǎ Ndiöxí Yaá ndécú nchaa nduu nchaa quíú, chi ndècu ndihi ñaha-gá xií-yu, te cúú-yu ñáyiu càháⁿ váha cuendá tnúhu-gá. ¹⁶Te cùtnuní

ndáá iní-ó sã ïo càhnu cuu tnúhu càháⁿ Xítohó Jesucrístú, tnúhu sã càháⁿ nàcuáa ndùu ichi ndecu-o, te duha càháⁿ tnúhu-áⁿ:

Te ní quixi Yá cúu Ndiöxí ñuyíú-a ní cuu-gá ìⁿ ñáyiu,
 te Espíritú Yã Ndiöxí ní cáháⁿ ndáá-xi sã cúu-gã ìⁿ Yaá ío váha
 quide ndáá,
 te cue espíritú xínú cuèchi núú Yã Ndiöxí ní xiní ndáá-xi nchaa
 nàcuáa ní quide Yaá ní quixi ñuyíú-a.
 Te ní xíté nuu tnúhu-gá nihí ñuyíú-a,
 te ndëni ní cuu ní ngúíta-yu sàndáá iní ñáhã-yu xii-gá,
 te mee-gã cuánda-gá andiu.

Duha càchí tnúhu-áⁿ.

Ñáyiu dañã nihnu vá quèndáá-gá iní-yu Yá Ndiöxí

4 ¹Te Espíritú Yã Ndiöxí càháⁿ ndáá-xi sã sàá nduu dàña nihnu dava ñáyiu ndècu ichi-gá vá quèndáá iní ñáhã-gã-yu xii-gá, te ducaⁿ chi cue espíritú cúndìhi yucu ñávãha dandàhú ñáhã-xí xí-yu, te mee-nã nchaa tnúhu càháⁿ nchaa ñáyiu cùndìhi nchaa espíritú-áⁿ cuhuⁿ iní-yu. ²Te nchaa ñáyiu ducaⁿ cùndìhi cue espíritú cúndìhi yucu ñávãha-áⁿ cúu-yu ñáyiu ío dandahú méé-xí chi càchí-yu sã càháⁿ ndáá-yu te ñã ndáá, te ñã túú tnàhí-gá ná quidé-xí iní-yu cuèndá nchaa sã cuèhé sã dúhá quidé-yu. ³Te ñáyiu-áⁿ quesàhá-yu sã vã cúu càndeca tnaha ñáyiu, te ni vã cúu càxí-yu dava núú sã xíní-yu caxí-yu, dico Yá Ndiöxí ní cadúha-gá nchaa sã nchító-ó cuèndá caxi-o, te cuíní-gá sã ncháá nchòo ñáyiu sàndáá iní tnúhu-gá ndacáⁿ táhú-ó nùú-gã òré caxi-o. ⁴Te nchaa sã ñ cadúha Yá Ndiöxí cúu-xí sã vãha te vá dáquèè tíhú-ó, te xini ñuhu-xi ndacáⁿ táhú-ó nùú-gã cuèndá nchaa xíãⁿ. ⁵Te Yá Ndiöxí càchí-gá sã méé-gã quidé-gã cúu-xí sã vãha sã cúu-xí-ó te núu na ndacáⁿ táhú-ó nùú-gã.

Tée quide ndáá xínú cuèchi núú Xítohó Jesucrístú

⁶Te núu na dàcuaha-n ñáyiu ndècu ndihi-o ichi Xítohó Jesucrístú nchaa nàcuáa càháⁿ-í-a ñã, te cuu-n ìⁿ tée quide ndáá xínú cuèchi núú-gã, te nducu ndè-ni-n dacuaha-n tnúhu Yá Ndiöxí sã sàndáá iní-n, te canchicúⁿ nihnu-ni-n càda-n nchaa nacuáa càháⁿ-gá, te núu ducaⁿ nà cada-n, te níhí ndéé-n cùndecu-n ichi-gá. ⁷Te vá cádá cuèndá-n nchaa cuèndú cuèhé cuèndú duha càháⁿ ñáyiu, ndihi nchaa dava-gá cuèndú sã ñã túú nandíhi cuèndá sã ñã túú nã cumání-n cùndecu-n núú Yã Ndiöxí. ⁸Te núu ìⁿ chiuⁿ cada-o te nacaá luha yiqui-o te nandíhi-xi luha, dico ío-gá nandíhi-xi te núu cada-o sã cùndecu yíñuhu-o núú Yã Ndiöxí. Te núu ducaⁿ na càda-o te cùu-xi ìⁿ sã vãha sã cúu-xí-ó vitna, te ni caa ni quíhíⁿ ducaⁿ cùu-xi ìⁿ sã vãha sã cúu-xí-ó. ⁹Te xini ñuhu-xi sã ncháá-ndó quèndáá iní-ndó nchaa

tnúhu cãháⁿ-í-a chi cùu-xi tnúhu ndáá. ¹⁰Te vitna ío ndùcu ndee-o quide-o chiuⁿ Yá Ndiöxí Yaá ndécú nchàa nduu nchaa quíú te quide ndee iní-ó cuendá nchaa sá quidé ñàha ñáyiu xii-o, chi sàndáá iní-ó sã díú-gã chindèe ñaha-gá xii-o. Te nchaa ñáyiu cùndahú iní ñáhá-gã te chindèe ñaha-gá xii-yu, dico ñáyiu sàndáá iní ñáhá xii-gá ío-gá cúnúú-yu chindèe ñaha-gá xii-yu, chi dàcácu nihnu ñaha-gã núú ùhú núú ndàhú.

¹¹Te nchaa tnúhu-áⁿ cũñaha-n xii-yu, te cãháⁿ-n dõho-yu sá ná càdá-yu nchaa nàcuáa cãháⁿ-xi. ¹²Te ío cada váha-n cùndecu-n cuendá sá vã yõo daquèe tñhú ñáhá xii-n cuendá sá cúú-n tõe cuechi, te ío váha cada-n nchàa sá tàú-n càda-n cuendá ducaⁿ cànchicúⁿ nihnu nchaa ñáyiu ndècu ichi Yá Ndiöxí, te vii vii cãháⁿ ndìhí-n-yu, te cuu iní-n-yu, te ío quindáá iní-n Yá Ndiöxí, te mee-ni sã vãha cani iní-n, te ducaⁿ càda-n cuendá canchicúⁿ nihnú-yu. ¹³Te nini cùyaa-í quixi-í, te ío nducu ndèe-n cãháⁿ ndodo-n tnúhu Yá Ndiöxí núú-yu, te dacuàhá-n-yu nàcuáa cãháⁿ tnúhu-gá, te cãháⁿ-n dõho-yu nàcuáa cuu vii cuu váha iní-yu cundecú-yu ichi Yá Ndiöxí. ¹⁴Te vá dáñá ndèe-n càda-n nacuáa ndùu táhú ñí taxi Yá Ndiöxí ní ngúndecu ndìhi-n cùtnàhá ní sacáⁿ ndodo cue tée yìndaha ñaha xii ñáyiu ndècu ichi Yá Ndiöxí ndaha-güedé díquí-n, te ní cachí tnúhu-güedé sá dúcáⁿ ñí cuiní Yá Ndiöxí cunduu.

¹⁵Te ñi yùhu ñi iní-n càda-n nchaa nacuáa cãháⁿ-í-a cuendá sá ná quini ñáyiu sá ïo-gá váha ta quide-n cuáháⁿ. ¹⁶Te ío váha cundehe-n nchàa nacuáa quide-n, ndìhi nchaa nàcuáa dànehé-n-yu, te vá dáñá ndèe-n dùcaⁿ cada-n. Te núu ducaⁿ na càda-n te nduu táhú-n cùndecu váha-n núú Yá Ndiöxí ñi caa ñi quíhíⁿ ndìhi nchaa ñáyiu na tèdóho nchaa tnúhu cãháⁿ-n.

Nàcuáa tàú-xi cada-o cùndecu-o ndìhi ñáyiu sàndáá iní tnúhu Yá Ndiöxí

5 ¹Te vá ténàá-n nchàa cue tée cùu sacuéhé chi vii vii cãháⁿ-n dõho-güedé, te cada iní-n sã dàtná tãtá-n cùu-güedé, te diu-ni ducaⁿ vii vii cãháⁿ-n dõho nchaa cue tée cuechi, te cada iní-n sã dàtná cue ñani-n cùu-güedé. ²Te diu-ni ducaⁿ vii vii cãháⁿ tucu-n dõho nchaa ñáyiu dìhí ñáyiu cùu sacuéhé, te cada iní-n sã dàtná ñaná-n cùú-yu, te diu-ni ducaⁿ vii vii cãháⁿ tucu-n dõho nchaa ñáyiu dìhí ñáyiu cuechi, te cada iní-n sã dàtná cue cúha-n cùú-yu, te ío cuu váha iní-n òré ducaⁿ cãháⁿ-n dõho nchaa ñáyiu cuechi-ãⁿ.

³Te canehe-n sã yíñùhu núú ñáyiu dìhí ní quendóo quèé, te chindèe-n-yu núu ndàhú-yu. ⁴Te núu ñí ñaha quèé ndécú cuè déhe-aⁿ àdi cue déhe ñani-aⁿ, te ío xìni ñuhu-xi cada-güexi nchaa nacuáa tàú-xi cunduu núú-aⁿ chi ducaⁿ cuiní Yá Ndiöxí cada-güexi. Te núu ducaⁿ na càda-güexi te nànchocáva-güexi quide-güexi sá vãha sá cúú-xí ñáyiu ní dácuéhnú ñaha xii-güexi. Te núu ducaⁿ na càda-güexi te quide váha-güexi te ío nduu vétú

iní Yă Ndiöxí. ⁵Te ñáyiú quèè ñáyiú ndàhú ndécú ìchi Yá Ndiöxí sàndáá iní-yu sá díú-gă chindèè ñaha-gá xii-yu, te cuèi nduu cuèi niú ñá túú dàña ndeé-yu càháⁿ ndihi ñàhá-yu xii-gá. ⁶Te nchaa ñáyiú quèè cúdǐí ìní quidé nchàa sá cuèhé sá dúhá cùú-yu dàtná ñáyiú ní xíhí cuèi ndècu vívũ-yu. ⁷Te cúñaha-n xii nchaa ñáyiú sá ná cádă-yu nchaa tnúhu càháⁿ-í-a cuèndá sá ñà túú nă cumánĩ-yu cundecú-yu, te ducaⁿ vă yõo cáháⁿ cuèhé cuèndá-yu. ⁸Te ío xini ñuhu-xi chindeé-yu cue tnàha ñáyiú-yu, dico ío-gá xíní ñùhu-xi chindeé-yu cue ñáyiú cùu ndi meé-yu ndècu ndihí-yu, te núu vá dúcáⁿ càdá-yu te ñá túú-gă sàndáá iní-yu cadá-yu nàcuáa càháⁿ Yă Ndiöxí. Te sá dúcáⁿ ná càdá-yu te vihi-gá quídě-yu dàcúxí ñáyiú ndècu ichi cuehé ichi duha.

⁹Te chido tnùnĩ-n mèe-ni ñáyiú quèè ñáyiú sa ndècu únídico cuía-xi àdi vihi-gá cuèndá ñáyiú-áⁿ cadá-yu nchaa nàcuáa cuìní Yă Ndiöxí núú nchàa ñáyiú ndècu ichi-gá, te ñáyiú-áⁿ xíní ñùhu-xi cuú-yu mee-ni ñáyiú ní quide ndáá ní xíndecu ndihi yii-xi. ¹⁰Te na cùú-yu ñáyiú quèè quidé văha cùdiu núú nchàa ñáyiú, te na cùú-yu ñáyiú quèè xíní canu ichi váha cue landú-xi, te na cùú-yu ñáyiú sãñaha nùu vehe ndetatú cue ñáyiú ñùhu ichi, te na cùú-yu ñáyiú ndècu túha quide nání chiuⁿ cuèndá cue ñáyiú ndècu ichi Yá Ndiöxí, te na cùú-yu ñáyiú chindee nchaa ñáyiú ndècu ndihi tnúndòho tnúhu ndàhú, te na cùú-yu ñáyiú ñá túú dàña ndeé quidé nchàa núú sã văha.

¹¹Te vá chídó tnùnĩ-n ñáyiú quèè ñáyiú ñá túú ndècu únídico cuía-xi cada chiuⁿ Yá Ndiöxí, chi núu cuechi-gă-yu ña, te vá cúndáá-yu cadá-yu chiuⁿ-gá, chi quesàhá-yu natnándaha tucú-yu. ¹²Te sá cuèndá xíãⁿ te nacháhu-yu núú Yă Ndiöxí, chi vá cádă-gă-yu nàcuáa ní cuu tnúhu cadá-yu ni cùu. ¹³Te nguíta-yu cani iní-yu quíhĩⁿ-yu ndi vehe ndi vehe caca nihní-yu, te nchaa ñáyiú ducaⁿ quide ío cùu cuhndú-yu, te cùyiti yuhú-yu, te nděni ní cuu cuáháⁿ-yu chinee díquĩ-yu vehe tnàha ñáyiú-yu ndèhé-yu núu nása ndécú-yu, te ñá túú tàú-yu ducaⁿ càdá-yu, te càháⁿ-yu mee-ni tnúhu sá ñà túú nàndíhi. ¹⁴Núu xíãⁿ cuìní-í sá ncháá ñáyiú quèè ñáyiú cuechi na nàtnándaha tucú-yu cuèndá cuú-yu năná, te ducaⁿ càdá-yu nchaa sá xíní ñùhu-xi cadá-yu vehé-yu, te núu ducaⁿ na càdá-yu, te nchaa ñáyiú cùu úhú iní ñáhá xii-o vá ñihí-gá-yu tnúhu cáháⁿ cuèhé-yu cuèndá tnúhu Yá Ndiöxí. ¹⁵Te dava ñáyiú quèè ndécú ìchi Yá Ndiöxí ní cùu ní dáñă-yu te ní tniĩ-yu tnúhu càháⁿ sácuíhná.

¹⁶Te núu dava ñáyiú ndècu ichi Yá Ndiöxí ndécú ndihí-yu iiⁿ ñaha quèè cúú ndi meé-yu ña, te tàú-yu chindee ñàhá-yu xii-aⁿ cuèndá sá vă ïo chi chiuⁿ-aⁿ nchaa ñáyiú ndècu ichi Yá Ndiöxí, te ducaⁿ te nchaa ñáyiú ndècu ichi-gá-áⁿ ñihí ndéé-gă-yu chindèé-yu dava-gá ñáyiú quèè ñá túú vèdana ndècu ndihi.

17Te nchaa cue tée ío váha quide yindaha ñaha xii ñáyi ndècu ichi Yá Ndiöxí ío xini ñuhu-xi canehe sá yíhí ñuhu núu-güedë, te chindee ñaha xii-güedë. Te uuⁿ-gá tàú ñáyi ducaⁿ càdá-yu sá cúú-xí nchàa cue tée ni yùhu ni iní càháⁿ tnúhu-gá. 18Te núu tùtú Yă Ndiöxí càchí-xi: “Vá chíhí-ndó ñunu yuhu ndicutu oré danchihí-di tríú”, duha càchí-xi. Te càchí tucu-xi ingá xichi: “Híⁿ tée quide chiuⁿ dacuitíí tàú-xi sá cúhúⁿ yăhu-dé”, duha càchí-xi núu tùtú-gá.

19Te núu ío ñáyi véxi sàcáⁿ cuéchi núu-n cuendá íiⁿ tée yindaha ñaha xii ñáyi ndècu ichi Yá Ndiöxí ñá, te cada cuendá-n tnúhu càháⁿ-yu te núu véxi-yu ndihí úú àdi úní ñáyi càháⁿ ndáá nàcuáa ní cuu, áⁿ nùu ñáhá te vá cáda cuendá-n tnúhu càháⁿ-yu. 20Te núu cue tée yindaha ñaha xii ñáyi-áⁿ ndécú cuéchi-güedë, te cáháⁿ-n dôho-güedë núu nchàa ñáyi ndècu ichi-gá cuendá sá dává-gă-yu vá cúyí-yu ducaⁿ càdá-yu. 21Te Yá Ndiöxí ndihí Xítohó Jesucristú náhá-gă ndihí cue espíritú xínú cuéchi núu-gă sá yùhú càháⁿ-í dôho-n sã cáda-n nchàa nacuáa càháⁿ-í-a, te íiⁿ-ni cãháⁿ ndihí-n cuè tée xini tnáhá ndihí-n, ndihí cue tée ñá túú xini tnáhá ndihí-n. 22Te vá ío cundihí iní-n tàxi ndecu-n íiⁿ tée quindaha ñaha xii ñáyi, chi díhna-gá cada cuendá-n te núu cùu-dé íiⁿ tée quide ndáá, chi núu cuendá-ni na tàxi ndecu-n-dé te vá cáda ndáá-dé, te yòhó ndaa díquí-n cuendá nchaa sá cuèhé sá dúhá càda-dé, te ío coto-n mée-n vá cáda-n ni íiⁿ sá cuèhé sá dúhá.

23Te ducaⁿ ío mee-ni cùhú xití-n te vá cóhó-n mée-ni ndute, chi tnàhá luha vínú ndéhé yoho yàha stilé coho-n cuendá cada tátna-xi.

24Te dava ñáyi cùtnuní nchaa sá cuèhé sá dúhá quidé-yu, te cùtnuní tucu sá náchăhu-yu na sàá nduu, te dava tucú-yu chi ñá túú cùtnuní nchaa sá cuèhé sá dúhá quidé-yu, dico na sàá nduu cùndáá cuéchi-yu te dàvá-áⁿ cutnùní. 25Te ducaⁿ sãtnahá-xi cùu nchaa sá vâha quide davá-yu chi cùtnuní, te cuèí ñá túú cùtnuní òré-ni dico dacuitíí sã sàá nduu cùtnuní.

6 1Te nchaa ñáyi ndècu tnuú quidé chiúⁿ ndihí íiⁿ patróóⁿ xini ñuhu-xi ío canehé-yu sá yíñùhu núu-dë cuendá sá vă càháⁿ cuèhé ñáyi cuendá Yă Ndiöxí, te ni vă càháⁿ cuèhé-yu cuendá tnúhu-gá. 2Te núu patróóⁿ cue ñáyi xinu cuechi-áⁿ sàndáá iní-dé Yă Ndiöxí, te ñá díú sã dúcáⁿ sàndáá iní-dé Yă Ndiöxí te vá cánèhé-yu sá yíñùhu núu-dë, chi uuⁿ-gá tàú-yu cada váha-yu cunu cuèchí-yu núu-dë, te ducaⁿ na càdá-yu chi xinu cuechí-yu núu tée sàndáá iní ndihí-yu tnúhu Yá Ndiöxí. Te vá dáñá ndéè-n dànehé-n-yu nchaa nàcuáa càháⁿ-í-a, te cúñaha-n xíi-yu sá ná càdá-yu.

Nduu vétú iní-ó cùndecu-o

3Te ío cue tée ñá túú tnèi-güedë nàcuáa càháⁿ tnúhu Xítohó Jesucristú, te cue tée-áⁿ càchí-güedë sá càháⁿ ndáá-güedë dico ñá ndáá, chi ñá túú

càháⁿ-güedé nàcuáa cuáháⁿ tnúhu-gá. Te nchaa tnúhu Xítóhó Jesucrístú cúú-xí mèe-ni tnúhu ndáá, te chindee ñaha-xi cada ndáá-ó cùndecu-o ichi-gá. ⁴Te nchaa cue tée ducaⁿ xíquide quide cahnu-güedé méé-güedě dico ñá túú vèdana xìní-güedé, te cue tée-áⁿ ñà túú ndècu váha iní-güedé chi nándi tnúhu sá ñà túú nàndíhi cuíní-güedé cútnàha-güedé. Te ngüíta-güedé cúú cuèdú ínì tnáhá-güedě, te nàá ndihi tnàhá-güedé, te xícuèhé tnáhá-güedě, te ñá túú-gă cúú váha ínì núú tnáhá-güedě. ⁵Te cue tée-áⁿ mee-ni nàa-güedé chi ñá túú sàni váha iní-güedé, te ni ñà túú xìní-güedé nàcuáa cuáháⁿ tnúhu ndáá tnúhu Yá Ndiöxí, te càchí-güedé sá ïo váha cundecu-güedé ichi-gá chi sàni iní-güedé sá ïo vèi díhúⁿ ñíhí-güedě cundecu ndihi-güedé. Te yúhú càháⁿ-í dóho-n sã vã ñíhí tnáhá-n ndíhi nchaa cue tée ducaⁿ xíquide. ⁶Te ndáá sá ìchi Yá Ndiöxí cúú-xí ñìⁿ ichi sá ïo váha cundecu-o, dico xìnì ñuhu-xi nduu vétú ínì-ó nàcuáa ndècu-o ñuyíú-a. ⁷Te nchoo cuè ñáyíu chi ñá túú vèdana nèhe-o ní quexìo ñuyíú-a, te diu-ni ducaⁿ ñà túú vèdana canehe-o quíhíⁿ òré ná cùú-ó. ⁸Te ío xìnì ñuhu-xi nduu vétú ínì-ó te núu ndècu-ni sá cúnchìto-o ndíhi dóó cuihnu-o. ⁹Te ïo ñáyíu ío cuíní-yu cuu cuicá-yu, te ñáyíu-áⁿ dácàhu ínì ñáhá yùcu ñávàha xíí-yu cadá-yu nándi sá cuèhé sá dúhá, te nándi-gá nchaa sá cuèhé sá dúhá càhu ínì-yu quidé-yu, te nchaa sá quidě-yu-áⁿ ñà túú vèdana nàndíhi-xi chi uuⁿ-gá ndádá ndàhú ñáhá-xí xíí-yu, te dàcuíta nihnu ñaha-xi. ¹⁰Chi nchaa ñáyíu ñùhu ínì mee-ni díhúⁿ, te xíáⁿ quidé-xí ngüíta-yu sàni ínì-yu cadá-yu nándi sá cuèhé sá dúhá. Te ïo ñáyíu ndècu ichi Yá Ndiöxí te sá tnúhu ducaⁿ ñùhu ínì mee-ni díhúⁿ ñí dáñá-yu ñá túú-gă sàndáá ínì ñáhá-yu xii-gá, te vitna ñá túú tnàhí-gá ndécú váha ínì-yu.

Cahni ínì-ó càda-o nchaa nacuáa càháⁿ Yá Ndiöxí chi sàndáá ínì-ó-gă

¹¹Te yòhó tée quide chiuⁿ Yá Ndiöxí xìnì ñuhu-xi vá cadá-n dàtná quidé nchàa ñáyíu ní cachí-í sá ñà túú quide ndáá, te vá dáñá ndèé-n càda ndáá-n cùndecu-n, te cada-n nàcuáa nduu vétú ínì Yá Ndiöxí, te ío quindáá ínì-n-gă, te cuu ínì-n nchàa tnaha ñáyíu-n, te cada càhnu ínì-n nchàa sá ná yàha-n cùndecu-n ichi-gá, te cunduu ndàhú ínì-n. ¹²Te cahni ínì-n càda-n nchaa nacuáa cuínì Yá Ndiöxí chi sàndáá ínì-n-gă, te ío cuhuⁿ ínì-n sã cúndècu-n ndíhi Yá Ndiöxí ni caa ni quíhíⁿ, chi diu cuendá tnàhí-áⁿ ñí càháⁿ ñáhá-gă xii-n, te ní càháⁿ ndáá-n núú vèi ñáyíu sá ïo váha sàndáá ínì-n-gă. ¹³Te Yá Ndiöxí Yaá quidé nchìto nchaandi túhú sá ïo ñuyíú nàha-gá sá càháⁿ-í dóho-n vitna, te diu-ni ducaⁿ nàha tucu Xítóhó Jesucrístú Yaá ní càháⁿ tnúhu ndáá núú tẽ Pilatú ¹⁴sá quindáá ínì-n càda-n nchaa nacuáa càháⁿ Yá Ndiöxí, te nchaa tnúhu càháⁿ-gá cada-n nàcuáa vá dáquèe tíhú ñáhá ñáyíu xii-n, te ducaⁿ-ni càda-n ndéé ná sàá nduu quixi tucu Xítóhó Jesucrístú. ¹⁵Te quixi tucu-gá chi ducaⁿ ñí cachí Yá Ndiöxí

cunduu, te mee Yă Ndiöxí nánhá-gă ná nduu quixi tucu Xítóhó Jesucristú. Te Yá Ndiöxí ío váha cùu iní-gá te ìⁿdii díí-ni-gă ío-gá cúnùu-gá dàcúxí cuè téè tàxi tnuní ìⁿ ìⁿ nàcióⁿ ndihi nchaa dava-gá cue téè cùnùu, chi tàxi tnuní nánhá-gă xii-güedé, te nchaa ñáyiu ndècu ñuyíú-a tàxi tnuní-gá. ¹⁶Te diu-gá cúú-gă Yaá ndécú nchàa nduu nchaa quíú, te ío càhnu cuu-gá chi dàtná dáyèhé nchíanchii dáyehé-xi núú ndécú-gă, te vá yöö ìⁿ cùyii dayatni núú ndécú-gă, te ni ñă túú nì ìⁿ ñáyiu xíní nánhá xii-gá te ni vă ndácũ-yu quiní ñáhă-yu xii-gá. Te ío na cànehe nchaa ñáyiu sá yíñùhu núú-gă ni caa ni quíhíⁿ, te ducaⁿ ìo na tàxi tnuní-gá ni caa ni quíhíⁿ. Te ducaⁿ na cùnduu.

¹⁷Te cáháⁿ-n dõho nchaa ñáyiu cuica ndècu ndihi nchaa sá ío ñuyíú-a cuendá sá vă cádá càhnú-yu mèe-yu, te duuⁿ duuⁿ vá cùndèé iní-yu ni ìⁿ sá ndécú ndíhí-yu chi vá cúdíi-xi, te cáháⁿ-n dõho-yu sá ná cùndeé iní-yu Yá Ndiöxí chi diu-gá cúú-gă Yaá ndécú nchàa nduu nchaa quíú, te chitu núú ndáhá tàxi-gá nchaa sá xíní ñùhu-o, chi cuíní-gá sá ìo cuu váha iní-ó cùndecu-o. ¹⁸Te cáháⁿ tucu-n dõho-yu sá ná càdá-yu mee-ni să vâha, te cuendá nchaa sá vâha cadá-yu-áⁿ te cuú-yu ìⁿ ñáyiu cuica să cúú-xí Yă Ndiöxí, te na cùndecu túha-yu chindèe-yu cue ñáyiu ndàhú cuáñhàhă-yu sá xíní ñùhú-yu. ¹⁹Te núú ducaⁿ na càdá-yu te Yá Ndiöxí cuáñaha-gă sá ndúú tãhũ-yu na sàá nduu, te ngúndecu váha-yu ndihi-gá ni caa ni quíhíⁿ.

Tnúhu ndéé núú nì ndihi-ná

²⁰Te yòhó té Timùteú càháⁿ-í dóho-n să ìo cada cuendá-n vă dăma tnúhu ní taxi Yá Ndiöxí danèhé-n ñáyiu, te vá cádá cuendá-n nchàa cuendú cuèhé cuendú duha ío ñuyíú-a chi ñă túú nàndíhí-xi, te ni vă cádá cuendá-n nchàa tnúhu xitnàha ñáyiu càchí sá xícá nàha tnúhu cue téè túha chi ñă díú ìⁿ tnúhu ndáá cúú-xí. ²¹Te ío ñáyiu ñă túú-gă sàndáá iní-yu tnúhu Yá Ndiöxí, chi ní quide cuendá-yu nchaa tnúhu xica naha ñáyiu-áⁿ.

Te Yá Ndiöxí ná chindee chitúu ñaha-gă xii-n. Te ducaⁿ na cùnduu. Te ío cada ndee iní-nă vitna.